


# Chemen Bondye A





© 2010 by World Missionary Press, Inc., Rose Stair Goodman, author. Cover art, Edwin B. Wallace. Meryl Esenwein, art above and on pages 10, 12, 14, 16, 27, 29, 39, 41, 42, 44, 46, 47, en 48. Nou pran tèks sa a nan Bib Kreyol ayisyen an. *Haitian Bible — Edition Corrigée* © Société Biblique Haitienne, 1998. Se ak pèmisyon nou itilize tèks sa a.

# **BONDYE TE KREYE LEMONN AK TOU SA-K LADAN-L**

**1**

**Nan konmansman, Bondye kreye syèl la ak latè  
a. –Jenèz 1:1**

**Se ak li Bondye te kreye tou sa ki nan syèl la ak  
sou latè. –Kolosyen 1:16a**

**Se pou Senyè a ki fè syèl la ak latè a voye  
benediksyon li sou nou! Syèl la se pou Senyè a li  
ye. Li bay moun latè pou yo. –Sòm 115:15, 16**

**Latè te kòrèk nèt, lè Bondye te bay lòm li. Li ti trete sa  
pou wè sa-k te rive.**



**Bondye di ankò: Ann fè moun. N'ap fè l pòtre ak nou,  
pou li sanble ak nou. L'a gen pouvwa [gouvène]... sou  
tout latè.**

**—Jenèz 1:26a**

## **NONM LAN TE VIN YON NANM VIVAN 3**

**Lè sa a, Senyè a, Bondye a, pran pousyè tè, li fè yon nonm. Li soufle nan twou nen nonm lan pou l ba li lavi. Epi nonm lan vin [yon nanm] vivan.\* –Jenèz 2:7**

**Senyè a, Bondye a, di ankò: Sa pa bon pou nonm lan rete pou kont li. M'ap fè yon lòt moun sanble avè l pou ede l. Lè sa a, Senyè a, Bondye a, fè dòmi pran nonm lan. Mesye dòmi nèt ale. Pandan l'ap dòmi an, Bondye louvri bò kòt li, li wete yon zo kòt. Apre sa, li fèmen twou a byen fèmen. Avèk zo kòt li te wete nan nonm lan, li fè yon fanm, li mennen l ba li.**

**–Jenèz 2:18a, 21, 22**

**\*Yon nanm vivan vle di nou va viv yon kote pou tout tan.**



Nou pa dwe janm obeyi vwa Satan.

**Senyè a, Bondye a, pran nonm lan, li mete l nan 5  
jaden Edenn lan pou l travay li, pou l pran swen l.  
Senyè a, Bondye a, bay nonm lan lòd sa a: — Ou  
mèt manje donn tout pyebwa ki nan jaden an. Men,  
piga ou manje donn pyebwa ki fè moun konnen sa ki  
byen ak sa ki mal la. Paske, jou ou manje l, w'ap  
mouri.** —Jenèz 2:15-17

**SEPAN AN, KE YO RELE TOU LEDYAB OU SATAN, TE  
KESYONE OTORITE BONDYE E LI TE BAY YO MANTI.**

**Lè sa a, sèpan an di fanm lan: Se pa vre. Nou p'ap  
mouri kras. Fanm lan gade, li wè jan pyebwa a te bèl,  
jan fwi yo sanble yo ta bon nan bouch. Li santi li ta  
manje ladan l pou je l ka louvri. Li keyi kèk fwi. Li  
manje, li pote bay mari l ki manje tou.** —Jenèz 3:4, 6

# ADAN AK EV PAT KA RETE NAN JADEN AN ANKO



Senyè a, Bondye a, mete Adan deyò nan jaden Edenn lan. Li voye l al travay tè, menm tè Bondye te pran pou fè l la. li mete kèk zanj cheriben ak yon manchèt klere kou dife nan men yo....pou anpeche moun pwoche bò pyebwa ki bay lavi a.

—Jenèz 3:23b, 24b



# SE TE YON JOU TRIS POU RAS LOM 7 NAN, LE ADAN AK EV TE PECHE



**Se poutèt yon sèl moun peche antre sou latè.  
Peché a louvri pòt pou lanmò. Se konsa lanmò vin  
pou tout moun.**

—Women 5:12a

## **Yon Bagay Pou Moun Sonje**

**Tout moun fèt ak nati peche a, e va mouri yon jou,  
paske lanmò vini ak peche. (Li Women 5:12 ankò.)**

# PLAN BONDYE POU SOVE NOU ANBA PECHE SE VOYE YON SEL PITIT LI A



**Li pral fè yon pitit  
gason. W'a rele l Jezi.  
Se li menm ki pral  
delivre pèp li a anba  
peche l yo.**

—Matye 1:21

Pou antre nan ras lòm  
nan, Pitit Bondye a te dwe  
vini kòm yon ti bebe.

**Se nan lavi Kris la t'ap mennen nan kò li a nou  
jwenn tou sa Bondye ye.**

—Kolosyen 2:9

**Anvan Bondye te kreye anyen, Pawòl la te la. Pawòl la te avèk Bondye. Sa Bondye te ye, se sa Pawòl la te ye tou. Pawòl la tounen moun. Li te vin viv nan mitan nou.**

**—Jan 1:1, 14a**

**Tou sa pase konsa pou pawòl Bondye te mete nan bouch pwofèt la te ka rive vre. Men sa I te di: Men li, jenn fi a pral ansent, li pral fè yon pitit gason. Y'a rele I Emannwèl. (Non sa a vle di: Bondye avèk nou.)**

**—Matye 1:22, 23**

**Nou gen yon ti pitit ki fenk fèt. Bondye ban nou yon gason. Se li menm ki pral chèf nou. Y'a rele I: Bon konseye k'ap fè bèl bagay la, Bondye ki gen tout pouvwa a, Papa ki la pou tout tan an, Wa k'ap bay kè poze a!**

**—Ezayi 9:6**

## 10 JEZIKRI — SAKRIFIS PAFE NOU AN

...Kris la pat janm fè okenn peche.... —2 Korent 5:21



**Li pat janm fè okenn  
peche.** —1 Pyè 2:22a

Okenn sakrifis (ofrann) lòm te  
kab fè, pa tap PAFE ase pou  
efase peche.

**Paske san bouk ak san jenn  
two bèf p'ap janm ka wete  
peche moun.** —Ebre 10:4b

Jezi se mouton Bondye a. **Men ti mouton Bondye a  
k'ap wete peche moun sou tout latè.** —Jan 1:29b

## **JEZI TE BAY VI LI POU SOVE NOU 11**

Yo te kloure Jezi sou yon kwa an bwa, paske moun mechan yo te rayi Li. Men sete volonte Bondye, pou Li te mouri. Jezi te ofri lavi Li pou sove ou ak mwen anba peche. Jezi te di: **Pèsonn pa ka wete lavi m, se mwen menm ki bay li paske mwen vle. Mwen gen pouvwa pou m bay li, mwen gen pouvwa pou m resevwa l ankò.**

—Jan 10:18a

### **NOU RACHTE AK SAN MOUTON BONDYE A**

Se pat avèk bagay ki ka pèdi valè yo tankou lajan ak lò. Men, se avèk gwo ofrann san Kris la ki te koule lè li te ofri tèt li tankou yon ti mouton san defo ni okenn enfimite.

—1 Pyè 1:18b, 19

### **PA GEN LOT SAKRIFIS KI TE KAB WETE PECHE**

Kifè nou netwaye anba peche nou yo [devni sen], se paske Jezikri te fè tou sa Bondye te vle, li ofri kò pa li bay Bondye yon sèl fwa, epi l fini.

—Ebre 10:10

**12** Se paske li bay san li pou nou kifè kounyeya  
Bondye fè nou gras. Nou pa bezwen mande si Kris  
la p'ap delivre nou tou anba kòlè Bondye. –Women 5:9

Chonje m wi lè w'a vin  
pran gouvènman an nan  
men ou!  
–Lik 23:42b

Brigan  
sa a te  
kwè nan  
Jezi e-l  
te sove.



Sa m'ap di ou  
la, se vre wi:  
Jòdi a ou pral  
avè m nan  
paradi.

–Lik 23:43b



Brigan sa a  
pa te kwè  
nan Jezi,  
poutèt sa li  
pat sove.

**Paske nou t'ap fè peche [t'ap dezobeyi Bondye] toujou lè  
Kris la mouri pou nou.**  
–Women 5:8b

**TOUT MOUN KI KWE NAN  
PITIT BONDYE A GEN LAVI**

**13**

**Paske, Bondye sitèlman renmen lèzòm li bay  
sèl Pitit li a pou yo. Tout moun ki va mete  
konfyans yo nan li p'ap pèdi lavi yo.**

**Okontrè y'a gen lavi ki p'ap janm fini an.**

**—Jan 3:16**

**Li rache nou anba pouvwa fènwa a, li fè nou antre  
nan peyi kote Pitit li renmen anpil la wa. Se gremesi  
Pitit sa a nou delivre, nou resevwa padon pou peche  
nou yo.**

**—Kolosyen 1:13, 14**



**Men, zanj lan pran  
pale, li di fanm yo:  
Nou menm, nou pa  
bezwen pè. Mwen  
konnen se Jezi n'ap  
chache, nonm yo te  
kloure sou kwa a.  
Enben, li pa isit la. Li  
leve vivan jan l te di a.  
Vini wè kote l te  
kouche a.**

**—Matye 28:5, 6**



**Mwen se moun ki vivan an. Mwen te mouri, men kounyeya, mwen vivan pou tout tan. Mwen gen pouvwa sou lanmò ak sou peyi kote mò yo ye a. –Revelasyon 1:18**

**Paske m'ap viv, nou menm tou n'ap viv. –Jan 14:19b**

**Paske Jezikri te gen laviktwa sou lanmò, e ke li kenbe kle lanmò, nou pa bezwen pè lanmò ankò.**


**Lè mwen pè, se nan ou mwen mete tout konfyans mwen. –Sòm 56:3**

**(Gade nan paj 46, pou wè pwomès Bondye yo.)**

### **JEZI KAB SOVE OU E LAP LAPRIYE**

**Men, Jezi li menm toujou vivan. Li ka delivre tout moun, l'ap fè yo pwoche bò kote Bondye paske li menm li toujou vivan, l'ap lapriyè Bondye pou yo. –Ebre 7:24a, 25b**

# OU MENM AK MOUIN KAB GEN LAVI ETENEL



**Kilès wout wap pran?**

Jezikri se CHEMEN an  
ki mennen kote Bondye  
nan LAVI etènèl.

Djab la ou Satan se  
chemen ki mennen nan  
LANMO.

Ti gason sa a byen chwazi chemen lavi etènèl la.

**... Depi kounyeya chwazi sa nou vle sèvi a....**

**—Jozye 24:15**

**Chwazi lavi tande, pou nou ka viv, nou menm  
ansanm ak tout pitit nou yo.**

**—Detewonòm 30:19b**

## **JEZI SE CHEMEN LAVI ETENEL LA**

**Se li menm sèl ki ka bay delivrans paske Bondye  
pa bay non okenn lòt moun sou latè ki kapab  
delivre nou.**

**—Travay 4:12**

**Se mwen menm sèl ki Granmèt la, Senyè a. Pa  
gen lòt ki ka delivre nou pase mwen menm!**


**—Ezayi 43:11**

# 18    **POUKI SA NOU DWE CHWAZI JEZI SI NOU VLE GEN LAVI ETENEL?**

## **1. *Se Kris ki te vini.***

**...Mwen menm, mwen vin pou moun ka gen  
lavi ....**

**—Jan 10:10**



## **2. *Se Kris ki te renmen nou e ki te mouri pou nou.***

**Pitit Bondye a ki te renmen m  
sitèlman li te rive bay lavi l pou  
mwen.**

**—Galat 2:20b**

**Jezi te vin lòm, chè ak san tankou  
nou ... **Konsa, lè li mouri, li detwi****

**Satan ki te gen pouvwa pou touye moun. Li 19  
delivre tout moun ki pase tout lavi yo esklav paske  
yo te pè lanmò. —Ebre 2:14, 15**

### ***3. Se sèlman san Jezi ki remèd pou peche nou yo.***

**Se poutèt sa, mwen menm Senyè a, mwen  
mande pou yo vide tout san an sou lotèl la pou li  
ka wete peche (paolone) pèp la. Nou bay san an  
pou nanm nou. —Levitik 17:11b**

**Jezi, Pitit Bondye a, va netwaye nou ak san li  
anba tout peche nou yo. —1 Jan 1:7b**

**Se gremesi Pitit sa a nou delivre (sove), nou  
resevwa padon pou peche nou yo. —Kolosyen 1:14**



#### 4. *Se Kris ki te leve nan lanmò.*

**Nou konnen Kris la te leve  
sòti vivan nan lanmò, li pa  
gen pou l mouri ankò. Lanmò  
pa gen okenn pouvwa sou li.**

—Women 6:9

**Li mouri pou tout moun. Konsa, moun k'ap viv yo  
p'ap viv pou tèt pa yo ankò, men y'ap viv pou moun ki  
te mouri epi ki te leve sòti vivan nan lanmò pou yo a.**

—2 Korent 5:15

**Jezi te di, Paske m'ap viv, nou menm tou n'ap viv.**

—Jan 14:19b

**5. *Nou dwe gen Lespri Kris la nan nou pou nou ka resisite pou lavi etènèl.*** **21**

**Kris la ap viv nan kè nou tou, li ban nou espwa nou gen pou n patisipe nan bèl pouvwa Bondye a.**

**—Kolosyen 1:27b**

**Si Lespri Bondye ki te fè Jezikri leve sòti vivan nan lanmò a rete nan nou, li menm ki te fè Jezikri leve sòti vivan nan lanmò a, li va bay kò nou yo ki la pou mouri a lavi tou, pa pouvwa Lespri li a ki rete nan nou.**

**—Women 8:11**

**OU DWE SI KE LESPRI KRIS RETE NAN OU**

**Si yon moun pa gen Lespri Kris la nan li, li pa pou Kris la.**

**—Women 8:9b**

**Apre sa, li pran timoun  
yo nan bra l, li mete  
men l sou tèt yo  
chak, li beni yo.**

—Mak 10:16



**“Jezi renmen-m, mwen konn sa, paske Bib la di mwen sa.”**



**Men, Jezi rele timoun yo vin jwenn li, li di: 23**  
**Kite timoun yo vin jwenn mwen. Pa anpeche yo vini, paske peyi kote Bondye Wa a, se pou tout moun ki tankou timoun sa yo li ye. –Lik 18:16**

**Konsa tou, Papa nou ki nan syèl la pa ta renmen wè yon sèl nan ti piti sa yo rive pèdi. –Matye 18:14**

Sa pa fè diferans ki moun ou ye, ou ki kote ou rete, Jezi renmen ou e li te mouri pou ou. Jezi vle ou renmen li tou. Ou kab montre lanmou ou pou Jezi lè ou obeye Li.

**Si nou renmen m, se pou n obeye kòmandman m yo. –Jan 14:15**

**Yon timoun moutre ou sa l'ap sòti nan sa l'ap fè. –Pwovèb 20:11a**

## **24 KOUMAN OU KAB TWOUVE CHEMEN POU RIVE KOTE BONDYE**

**1. *Admèt ke ou menm se yon pechè (Wè paj 7).***

**Tout moun fè peche. Yo tout vire do bay Bondye ki  
gen pouvwa a.** –Women 3:23

**2. *Vini kote Bondye pà Jezikri.***

**Se yon sèl Bondye a ki genyen. Se yon sèl moun tou  
ki mete lèzòm dakò ak Bondye ankò, se Jezi, Kris la.**  
–1 Timote 2:5

**Se poutèt sa, ... li [Jezi] ka delivre tout moun, l'ap fè  
yo pwoche bò kote Bondye.** –Ebre 7:25a

**Jezi te di, Mwen p'ap janm mete moun ki vin jwenn  
mwen yo deyò.** –Jan 6:37b

### **3. Repanti de peche ou.**

(Repanti vle di: regrèt ase pou sispann fè peche.)

**Chanje lavi nou, tounen vin jwenn  
Bondye pou l ka efase peche nou yo.**

—Travay 3:19

**Senyè a pa pran twòp reta pou  
kenbe pwomès li yo, jan kèk moun  
kwè a. Okontrè, se pasyans l'ap  
pran ak nou, paske li pa ta  
renmen pèsonn peri, li ta vle pou  
tout moun tounen vin jwenn li.**

—2 Pye 3:9

### **4. Konfese peche ou yo bay Jezi.**

(Konfese vle di: pou di ou admèt.)

25



**26** Sou lin anba sa yo, ekri 1 Jan 1:9a ke ou twouve sou min kap lapriyè nan paj 25.

---

---

---

---

**5. *Kite peche ou yo.***


(Kite vle di: pa fè-l ankò, kite sa nèt.)

**Moun k'ap kache peche p'ap janm wè zafè yo mache. Men, Bondye va gen pitye pou moun ki rekonèt peche yo, pou moun ki chanje lavi yo.**

—Pwovèb 28:13

**Pa fè mal, fè sa ki byen.**

—Sòm 37:27a



**Se paske li renmen nou kifè  
li delivre nou . . . . Sa pa sòti  
nan nou menm menm, se yon  
kado Bondye ban nou. Non,  
nou pa fè anyen pou sa.  
Konsa, pèsonn pa ka vante  
tèt yo.**

—Efezyen 2:8, 9

## **6. Kwè nan Jezikri. 27**

**Si ou deklare ak bouch ou  
devan tout moun Jezi se  
Senyè a, si ou kwè tout  
bon nan kè ou Bondye te  
fè l leve sòti vivan pami mò  
yo, w'a sove.**

—Women 10:9

**Mete konfyans ou nan  
Senyè Jezi, epi w'a va  
delivre, ou menm ansanm  
ak tout fanmi ou.**

—Travay 16:31b

## 28 7. Resevwa Jezikri nan lavi ou e nan kè ou.

Ou menm sèl kab louvri pòt kè ou, e invite Jezi antre ladan-l. Jezi te di: **Koute. Men mwen kanpe la devan pòt la, m'ap frape. Si yon moun tandè vwa m, si l louvri pòt la ban mwen, m'a antre lakay li, m'a manje ansanm avè l, l'a manje ansanm avèk mwen.**  
—Revelasyon 3:20

Men, sa ki te resevwa l yo, sa ki te kwè nan li yo, li ba yo pouvwa tounen pitit Bondye.  
—Jan 1:12



Si anvan ou pat janm priye, e ou bezwen èd lapriyè, ou kab swiv lapriyè ki ekri anba, kòm gid.



**Chè Senyè Jezi,**

**Mèsi paske ou te mouri sou lakwa pou wete peche mwen yo. Mwen regrèt tout move bagay mwen te fè. Souple, vini nan kè mwen e rete pou tout tan. Mwen konfye nan ou kounyeya pou netwaye kè mwen. Mwen pran ou pou ou kapab Sovè e Senyè pa mwen.**

**M priye nan non pa ou, Amèn.**

## AVEK JEZI NAN KE OU, OU GEN LAVI ETENEL

**Bondye ban nou lavi ki p'ap janm fini an. Se nan Pitit li a li ban nou li. Moun ki gen Pitit la, yo gen lavi sa a tou.**

—1 Jan 5:11b, 12a

**Yon moun ki koute pawòl mwen, ki mete konfyans nan moun ki voye m lan, . . . deja sòti nan lanmò, li antre nan lavi.**

—Jan 5:24b


**Lè kò nou mouri, nou al rete kote Senyè a (2 Korent 5:8). Kris la ap viv nan kè nou tou, li ban nou espwa nou gen pou n patisipe nan bèl pouvwa Bondye a.**

—Kolosyen 1:27b

**Si ou te mande Jezi padone ou peche ou yo, e ou kwè nan Senyè Jezikri kòm Sovè ou, ekri non ou nan lin anba a:**

---





Li vèse ki ekri nan Bib la  
(Pawòl Bondye a) chak jou, sere  
yo nan kè ou e aprann pà kè  
kèk vèse ki ka ede ou. (Gen  
anpil nan ti liv sa a.)

**Tou sa ki ekri nan Liv la,  
se nan Lespri Bondye a yo  
sòti. Y'ap sèvi pou moutre  
moun verite a, pou konbat  
moun ki nan lerè, pou  
korije moun k'ap fè fòt, pou  
moutre yo ki jan pou yo viv  
byen devan Bondye.**

—2 Timote 3:16

# PALE AK JEZI NAN LAPRIYE NENPOT LE OU VLE

**Di Jezi mèsi** pou tout bon bagay nan lavi a. **Bay Li glwa** pou sa Li fè pou ou e paske Li te sove ou. **Priye pou nenpòt sa ou bezwen.** Priye nan non Jezi.



**Nou konnen l'ap koute nou si nou mande l kichòy ki dakò ak volonte li.**

—1 Jan 5:14b

**Nenpòt bagay nou mande Papa a nan non mwen, l'a ban nou li.**

—Jan 16:23b

**... Se pou yonn lapriyè pou lòt....**

—Jak 5:16

**Lapriyè pou moun k'ap pèsekite nou.**

—Matye 5:44b

# YON PRIYE JEZI TE MOUTRE DISIP LI YO 33

(You disip se yon moun kap swiv Jezi.)

Jezi te di disip Li yo, lapriyè konsa:

**Papa nou ki nan syèl la, Nou mande pou yo  
toujou respekte non ou. Vin tabli gouvènman ou,  
pou yo fè volonte ou sou latè, tankou yo fè l nan  
syèl la. Manje nou bezwen an, ban nou l jòdi a.  
Padonnen tou sa nou fè ki mal, menm jan nou  
padonnen moun ki fè nou mal. Pa kite nou nan  
pozisyon pou n tonbe nan tantasyon, men, delivre  
nou anba Satan. [Paske, se pou ou tout otorite, tout  
pouvwa ak tout lwanj, depi tout tan ak pou tout  
tan. Amèn].**

—Matye 6:9b-13

Moun dwe aprann priyè sa a pà kè. Kreyin yo konn resite priyè sa  
a byen fò.

# **34 DIS KOMANDMAN YO MONTRE NOU JAN POU NOU VIV**

(Egzòd, chapit 20)

*4 premye yo se konsènan lanmou nou pou Bondye*

- 1. Piga nou gen lòt bondye pase mwen menm selman.**
- 2. Piga nou janm fè okenn estatè ni okenn pòtre ki sanble bagay ki anwo nan syèl la....Piga nou adore yo, ni pigas nou sèvi yo.**
- 3. Piga nou sèvi mal ak non Senyè a, Bondye nou an.**
- 4. Toujou chonje jou repo a pou nou mete l apa pou mwen.**

**5. Respekte manman nou ak papa nou.**

**6. Piga nou touye moun.**

**7. Piga nou fè adiltè** (Adiltè se lè yon mari ou yon madanm pa fidèl.)

**8. Piga nou pran sa ki pa pou nou.**

**9. Piga nou bay manti sou frè parèy nou.**

**10. Piga nou pote lanvi sou sa ki pa pou nou.**

**LE NOU OBEYI BONDYE SA FE LI REPONN LAPRIYE NOU YO**

**Tou sa n'a mande l, l'a ban nou l, paske nou menm nou fè tou sa li mande nou, nou fè sa ki fè l plezi.**

*Renmen Bondye*

1. Jezi reponn li: Se pou ou renmen Mèt la, Bondye ou, ak tout kè ou, ak tout nanm ou, ak tout lide ou. Se kòmandman sa a ki pi gwo, ki pi konsekan.


—Matye 22:37, 38

*Renmen Pwochen Nou*

2. Men dezyèm kòmandman an ki gen menm enpòtans ak premye a: se pou ou renmen frè parèy ou tankou ou renmen pwòp tèt pa ou.

—Matye 22:39

Tout dis kòmandman yo (paj 34 ak 35) yo nan de pi gran kòmandman sa yo.



## Min Gran Chapit Sou Renmen An

(1 Korent 13:1-8, 13)

<sup>1</sup> Menm si mwen ta konn pale tout kalite lang moun pale ansanm ak lang zanj yo pale, si m pa gen renmen nan kè m, bèl pawòl mwen yo pa pi plis pase yon tanbou k'ap fè anpil bwi, pase yon klòch k'ap sonnen. <sup>2</sup>Menm si mwen ta gen don pou m fè konnen mesay ki sòti nan Bondye, menm si mwen ta gen tout kalite konesans, menm si mwen ta konprann tout ti sekre ki kache, menm si mwen ta gen konfyans anpil nan Bondye pou m fè mòn yo chanje plas, si m pa gen renmen nan kè m, mwen pa anyen. <sup>3</sup>Menm si mwen ta bay tout byen mwen yo, menm si mwen ta bay kò m pou yo boule l, si m pa gen renmen nan kè m, sa, p'ap sèvi m anyen. <sup>4</sup>Moun ki gen renmen nan kè li gen pasyans, li gen bon kè, li p'ap anvye sò lòt moun. Li p'ap fè grandizè, li

**38** p'ap gonfle ak lògèy. <sup>5</sup>Moun ki gen renmen nan kè li p'ap fè anyen ki pou fè moun wont, li p'ap cache avantaj pa l, li p'ap fè kòlè li p'ap kenbe moun nan kè. <sup>6</sup>Moun ki gen renmen nan kè li p'ap pran plezi l nan sa ki mal, li pran plezi l nan sa ki vre. <sup>7</sup>Moun ki gen renmen nan kè li sipòte tout bagay: nan nenpòt ki sitirasyon, li toujou gen konfyans nan Bondye, li p'ap janm pèdi espwa, l'ap toujou moutre jan li gen pasyans. <sup>8</sup>Renmen pa janm fini. Pouvwa pou bay mesay ki sòti nan men Bondye a pa la pou tout tan. Pouvwa pou pale langay gen pou fini yon lè, konesans gen pou disparèt.

<sup>13</sup>Kounyeya se twa bagay sa yo ki toujou la: se konfyans, se espwa, se renmen. Men, nan twa bagay sa yo, se renmen ki pi gran.


## **BONDYE SE RENMEN LI YE**

Bondye se renmen an menm. Moun ki gen renmen nan kè yo, yo fè yonn ak Bondye, Bondye fè yonn ak yo. —1 Jan 4:16b



# JEZI VLE OU TEMWAYE A LOT MOUN

39



(lakay ou, nan lekòl ou, nan  
legliz la, nenpòt kote ou ye)

Jezi te di: **Ale tounen  
lakay ou, nan mitan  
fanmi ou yo. Rakonte yo  
tou sa Bondye fè pou  
ou, kijan li te gen pitye  
pou ou.** —Mak 5:19b

# **40 KOU MAN OU KAPAB KONNEN YON VRE PITIT BONDYE**

**Konsa tou, n'a rekonèt fo pwofèt yo sou sa y'ap fè.**

**—Matye 7:20**

**Men, Lespri Bondye a bay renmen, kè kontan, kè poze, pasyans, bon kè, seryozite, li fè ou gen bon manyè. Li fè ou aji ak dousè, li fè ou konn kontwole kò ou.**

**—Galat 5:22, 23a**

## **YON VRE PITIT BONDYE PADONNE LOT MOUN**

**Si nou padonnen moun lè yo fè nou mal, Papa nou ki nan syèl la va padonnen nou tou.**

**—Matye 6:14**

## **7 BAGAY BONDYE RAYI**

**Se moun k'ap gonfle lestonmak yo sou moun, se moun k'ap bay manti, se moun k'ap touye moun inonsan, se moun k'ap fè move lide nan tèt yo pou fè mechanste, se moun ki toujou pare pou fè sa ki mal, se fo temwen k'ap bay manti sou moun, se moun k'ap mete frè ak zanmi dozado.**

**—Pwovèb 6:17-19**

## Travay Lachè



## TRAVAY LACHE:

... Imoralite, malpwòpte ak vis. Se sèvi zidòl, se fè maji, se yonn fè lòt lènmi, se fè kont, fè jalouzi, fè kòlè, se yonn pa vle wè lòt, se fè ti pil gwo pil. Yonn anvye sò lòt, yo tafyatè, yo saf konsa, ak yon bann lòt bagay ankò y'ap fè.... Moun ki fè tout bagay sa yo p'ap antre menm nan peyi kote Bondye wa a.

—Galat 5:19-21


... Moun pèvèti k'ap sèvi fanm ak fanm, gason ak gason, ... piyajè yo ....

—1 Korent 6:9,10

## KITE JEZI RANPLI OU AK LESPRI E FE OU PWOP

... Men, kounyeya Bondye mete nou nan kondisyon pou nou sèvi l. Gremesi Jezikri, Senyè a, li mete nou apa pou li, li fè nou gras pa pouvwa Lespri Bondye nou an.

—1 Korent 6:11



(Li Lik 16:19-26.)

Ou dwe si ke ou kwè nan Jezikri. Li va ekri non ou nan kaye sièl la.

Tout moun ki pat gen non yo ekri nan liv ki gen non moun ki gen lavi a, yo jete yo nan letan dife a tou. —Revelasyon 20:15

# **JEZI SE SEL CHEMEN KI MENNEN KOTE BONDYE**

**43**

**Bondye ban nou lavi ki p'ap janm fini an. Se nan Pitit li a li ban nou li.** —1 Jan 5:11b

**Peché peye nou kach: li ban nou lanmò. Men kado Bondye ban nou gratis la, se lavi ansanm ak Jezikri, Senyè nou an, yon lavi ki p'ap janm fini.** —Women 6:23

**Moun ki mete konfyans yo nan Pitit la, yo gen lavi ki p'ap janm fini an. Moun ki dezobeyi Pitit la, yo p'ap gen lavi sa a. Se kòlè Bondye k'ap tonbe sou yo.** —Jan 3:36

**Jezi reponn li: Se mwen menm ki chemen an. Se mwen menm ki verite a, se mwen menm ki lavi a. Pèsonn pa ka al jwenn Papa a si li pa pase nan mwen.** —Jan 14:6



Nan vizyon li nan Liv Revelasyon a, chapit 21, Jan te wè yon nouvo sièl e yon nouvel tè.

**Li gen pou l cheche tout dlo nan je yo. P'ap gen lanmò ankò, yo p'ap nan lapenn ankò, yo p'ap janm plenyen ankò, yo p'ap janm souffri ankò. Tout vye bagay sa yo pral disparèt. Lè sa a, moun ki te chita sou fòtèy la di: Kounyeya mwen fè tout bagay vin nèf. –Revelasyon 21:4, 5a**

Jan te wè tou vil sent la ki tap sòt desann nan sièl. **Lavil la menm te an bon lò, li te klere kou kristal. Gwo wòch fondasyon miray lavil la te byen òne ak tout kalite pyè bijou gwo pri.**

–Revelasyon 21:18b, 19a

# **JEZI TE ALE PARE YON PLAS POU TOUT MOUN KI KWE NAN LI**

**45**

**Jezi di yo: Pa kite bagay sa yo toumante nou. Mete konfyans nou nan Bondye, mete konfyans nou nan mwen tou. Lakay Papa a gen anpil kote pou moun rete. Mwen pral pare plas pou nou. Si se pat vre, mwen pa ta di nou sa. Lè m'a fin pare plas la pou nou, m'a tounen vin chache nou. Konsa, kote m'a ye a, se la n'a ye tou.**

**—Jan 14:1-3**

## **DI LOT YO BON NOUVEL SA A**

**Jezi te di: Ale toupatou sou latè, anonse Bòn Nouvèl la bay tout moun.**

**—Mak 16:15b**

**“Lè ou gen bon konprann, ou sove lòt moun.”**

**—Pwovèb 11:30b**

## 46 KEK PWOMES BONDYE FE PITIT LI YO

Mwen p'ap janm vire do ba ou, mwen p'ap janm lage ou.

—Ebre 13:5b

Bondye ap pase zanj li yo lòd pou yo veye sou ou, pou yo pwoteje ou kote ou pase. —Sòm 91:11

Pèsonn pa ka rache anyen ki nan men Papa

a.

—Jan 10:29b

Chonje sa byen: mwen la avèk nou toule-jou, jouk sa kaba.

—Matye 28:20b

Ou pa bezwen pè pou sa ou pral souffri ankò... Men, kenbe fèm menm si nou gen pou n mouri. M'a ban nou lavi pou rekonpans.

—Revelasyon 2:10

Rele m, m'a reponn ou. —Jeremi 33:3a





Tout mò yo va leve ankò.

**Lè a pral rive: tout mò ki nan tonm yo pral tandè vwa li, yo pral leve sòti vivan nan tonm yo. Moun ki fè sa ki byen pral leve pou resevwa lavi ki p'ap janm fini an. Men, tout moun ki fè sa ki mal pral leve pou resevwa kondannasyon yo.**

—Jan 5:28b, 29



*Sa yo ki te mouri nan Kris va leve anvan.*

**Aprè sa, nou menm ki va vivan toujou lè sa a, y'ap vin pran nou, nou menm ansanm ak moun ki sòti vivan nan lanmò yo, y'ap mete nou sou nyaj yo pou n'al kontre Senyè a anwo a. Konsa, nou tout n'ap toujou ansanm ak Senyè a.**

—1 Tesalonisyan 4:17

**Pa kite dòmi pran nou. Paske nou pa konnen ki lè lè a va rive.**

—Mak 13:33b



**Gade. Men Kris la ap vini sou tèt nyaj yo! Tout moun pral wè l. – Revelasyon 1:7a**

Pran prekosyon ak fo kris e ak fo pwofet yo.

**Lè sa a, si yon moun di nou: Gade, men Kris la bò isit, osinon: Men li bò la a, pa kwè li. Se pou si yo di nou: Gade, men l nan dezè a, nou pa bezwen ale. Osinon, si yo di nou: Gade, men l kache bò isit la, nou pa bezwen kwè yo. –Matye 24:23, 26b**

### **JEZI VA VINI BYEN VIT SOU NWAY YO**

**Tout nasyon ki sou latè va pran kriye. Y'a wè Moun Bondye voye nan lachè a ap vini anwo nyaj yo nan syèl la, avèk pou-vwa, nan mitan yon bann bèl bagay. –Matye 24:30b**

# SOM BEJE A

(Sòm 23)

**<sup>1</sup>Senyè a se gadò mwen, mwen p'ap janm manke anyen.** **<sup>2</sup>Kote zèb yo pi bèl, se la li fè m pran repo. Kote dlo a koule poze, se la li mennen m bwè.** **<sup>3</sup>Li fè m reprann fòs. Li fè m mache nan chemen dwat, pou sa sèvi yon lwanj pou non li.**

**<sup>4</sup>Menm si m'ap pase nan yon ravin kote ki fè nwa anpil, mwen p'ap pè anyen, paske, Senyè, ou la avèk mwen. Se baton ou ak gòl ou ki fè kè m pa kase.** **<sup>5</sup>Ou pare yon tab pou mwen devan je tout lènmi m yo. Ou resevwa m, ou fè kè m kontan ou ban m tou sa m bezwen.**

**<sup>6</sup>Wi, mwen konnen w'ap toujou renmen m, w'ap toujou bon pou mwen pandan tout lavi m. Se lakay ou m'ap rete tout tan tout tan.**

Published in numerous languages as God supplies funds in answer to prayer. If you would like more copies for prayerful distribution, write in English. Specify which language(s) you need and how many booklets.  
**World Missionary Press, PO Box 120, New Paris, IN 46553-0120 USA**



LI PA FET POU VANN.

Read booklets online or by App  
[www.wmp-readonline.org](http://www.wmp-readonline.org)